

«ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆ» ՀԻՄՆԱԴՐԱՄԻ ԻԶԵՎԱՆԻ

ՄԱՍՆԱՃՅՈՒՂԻ ԳԻՏԱԿԱՆ ԽՈՐՀՐԴԻ ՆԻՍՏԻ

25-ը դեկտեմբերի 2020թ.

Առցանց կազմակերպված նիստին մասնակցել է գիտական խորհրդի 35 անդամներից 32-ը: Նիստն անց է կացվել zoom.us հարթակում, գիտական խորհրդի նախագահն էր Ա. Հ. Մակարյանը, նիստի քարտուղարը՝ Մ. Ս. Աթոյանը:

Նիստի օրակարգը ներկայացրեց Ա. Մակարյանը:

Օ Ր Ա Կ Ա Ր Գ

1. Հաղորդում 2020թ.-ի ընդունելության արդյունքների մասին: /Զեկուցող՝ ԵՊՀ ԻՄ-ի ՈԻՄՎ պետ Ա. Դավթյան /
2. ԵՊՀ ԻՄ-ի 2019-2020թթ. ուսումնական տարվա գործունեության վերաբերյալ տնօրենի հաշվետվությունը: /Զեկուցող՝ ԵՊՀ ԻՄ-ի տնօրենի պաշտոնակատար Ա.Մակարյան /
3. ԵՊՀ ԻՄ-ի 2021թ. եկամուտների և ծախսերի նախահաշվի (բյուջե) մասին: /Զեկուցող՝ ԵՊՀ ԻՄ-ի գլխավոր հաշվապահ Մ. Մխիթարյան /
4. Ընթացիկ հարցեր:
 - 4.1. «Երևանի պետական համալսարան» հիմնադրամի Իջևանի մասնաճյուղում գիտական դրամաշնորհների տրամադրման կարգը հաստատելու մասին:
 - 4.2. «Երևանի պետական համալսարանի Իջևանի մասնաճյուղում բակալավրի ավարտական աշխատանքի պատրաստման և գնահատման կարգը» հաստատելու մասին:

Բաց քվեարկությամբ՝ 32 կողմ 0 դեմ, 0 ձեռնպահ համամասնությամբ որոշվեց
Որոշում՝ 48/1

➤ Հաստատել նիստի օրակարգը:

Օրակարգի առաջին՝ «Հաղորդում 2020թ.-ի ընդունելության արդյունքների մասին» հարցի վերաբերյալ **ԵՊՀ ԻՄ-ի ՈԻՄՎ պետ Ա. Դավթյանի** զեկույցը ներկայացվում է ստորև.

«2020-2021 ուստարում ԵՊՀ Իջևանի մասնաճյուղը բակալավրի առկա ուսուցմամբ ընդունելությունն իրականացրել է կրթության պետական կառավարման

լիազորված մարմնի կողմից հաստատված 12 մասնագիտությունների՝ 13 կրթական ծրագրերով:

Ընդունելության մրցույթին մասնակցելու համար դիմում-հայտ է ներկայացրել 266 դիմորդ: Հայտագրված դիմորդների 95%-ը կազմել են Տավուշի մարզի հանրակրթական ուսումնական հաստատությունների շրջանավարտները: Ընդունելության քննությունների արդյունքներով հրամանագրվել է 188 ուսանող:

«Բնապահպանություն և բնօգտագործում» կրթական ծրագիրը չի բացվել՝ դիմորդների ընդունելության քննության անբավարար արդյունքների պատճառով:

Բակալավրի հեռակա ուսուցմամբ ընդունելությունն իրականացվել է 7 կրթական ծրագրերով: Ընդունելության մրցույթին մասնակցելու համար դիմում-հայտ է լրացրել 135 դիմորդ: Քննություններին մասնակցել է 113 դիմորդ (22 դիմորդ, ելնելով պատերազմական իրավիճակից, քննությունները հանձնել են պատերազմից հետո): Քննությունների արդյունքով հրամանագրվել է 88 ուսանող:

2020թ. ԵՊՀ Իջևանի մասնաճյուղը հեռակա ուսուցմամբ ընդունելություն է իրականացրել նաև «Դպրոցական մանկավարժություն և մեթոդիկա» մագիստրոսական կրթական ծրագրով: Մասնաճյուղում անհրաժեշտ փաստաթղթեր ներկայացրել և ընդունելության դիմում-հայտ է լրացրել 38 դիմորդ: Ընդունելության հարցազրույցի և քննության արդյունքներով հրամանագրվել է 25-ը (6 դիմորդ չի ներկայացել, 7 դիմորդ դուրս է մնացել մրցույթից):

2020թ. ԵՊՀ Իջևանի մասնաճյուղը ընդունելություն է իրականացվել նաև ՄՄՈՒՀ-ից բարձր առաջադիմություն ցուցաբերած շրջանավարտների համար: Մասնաճյուղ է դիմել 33 շրջանավարտ: Ընդունելության արդյունքում հրամանագրվել է 32 ուսանող:

Այսպիսով 2020-2021 ուստարում Մասնաճյուղ է դիմել բակալավրի կրթական ծրագրով 434 դիմորդ, մագիստրատուրայի կրթական ծրագրով՝ 38 դիմորդ: Արդյունքում Մասնաճյուղում հրամանագրվել է բակալավրի կրթական ծրագրով 308 ուսանող, մագիստրատուրայի կրթական ծրագրով՝ 32 ուսանող:»

Առցանց քվեարկությամբ՝ 30 կողմ, 0 դեմ, 0 ձեռնպահ, ***որոշվել է:***

ՈՐՈՇՈՒՄ 48/2

Ընդունել ի գիտություն:

Օրակարգի երկրորդ՝ « ԵՊՀ ԻՄ-ի 2019-2020թթ. ուսումնական տարվա գործունեության վերաբերյալ տնօրենի հաշվետվությունը» հարցի հետ կապված ԵՊՀ ԻՄ-ի տնօրենի պաշտոնակատար **Ա.Մակարյանի** հաղորդումը հետևյալն էր.

« 2019-2020 ուսումնական տարին ԵՊՀ Իջևանի մասնաճյուղի համար մեկնարկել է հատուկ ոգևորությամբ և հետաքրքիր միջոցառումներով, գիտաժողովներով, աշխատաժողովներով՝ պայմանավորված Մայր բուհի 100-ամյա և նրա միակ մասնաճյուղի 25-ամյա հոբելյաններով: 25 տարի մասնաճյուղը հաջողությամբ կատարում է իր կրթական գործառնությունները և միաժամանակ հանդես գալիս ՀՀ հյուսիս-արևելյան տարածաշրջանի սահմանապահ ու անառիկ ամրոց: Այդ տարիների ընթացքում մասնաճյուղը տվել է 6000-ից ավել շրջանավարտ, ովքեր անփոխարինելի դերակատարություն ունեն մարզի զարգացման բոլոր ոլորտներում:

Մասնաճյուղի գործունեությունը մշտապես եղել և մնում է ԵՊՀ ղեկավարության և անձամբ ռեկտորի ուշադրության կենտրոնում: Այստեղ երկար տարիներ կողք-կողքի նվիրումով և սրտացավությամբ աշխատում և իրենց գիտական նվաճումներն ու փորձը երիտասարդությանն են փոխանցում Մայր բուհից հրավիրված բարձրակարգ դասախոսներն ու տեղացի մասնագետները, որոնցից շատերը մասնաճյուղի շրջանավարտներ են: Իր կրթական գործունեության և համագործակցային աշխատանքների շնորհիվ մասնաճյուղը վաստակել է Մայր բուհի, ՀՀ այլ բարձրագույն ուսումնական հաստատությունների և ամենակարևորը՝ տավուշցիների վստահությունը, ձեռք է բերել բարձր հեղինակություն, ինչի վառ ապացույցը դիմորդների թվի կայուն ցուցանիշն է և նաև աճը:

Ուսումնական տարին մասնաճյուղի գործունեությունն իրականացվել է 2016-2020թթ. զարգացման ռազմավարական ծրագրի նպատակներին և նրանց իրականացման պլան-ժամանակացույցին համապատասխան՝ կարևորելով կրթության որակը և նրա շարունակական բարելավումը:

2019-2020 ուսումնական տարին մասնաճյուղում կրթությունն իրականացվել է արտաքին փորձաքննություն անցած 13 կրթական ծրագրերով, որոնք տարեվերջին վերանայվել են հետազոտական բաղադրիչի ներդրման նպատակով. գործող բոլոր ծրագրերի համար առանձնացվել են հետազոտական բաղադրիչ պարունակող 2

դասընթացները, վերանայվել կրթական վերջնարդյունքները և փաթեթները, գրականության ցանկերը, դասավանդման և ուսումնառության մեթոդները:

Տարածաշրջանի աշխատաշուկայի և դիմորդների հոսքի պարբերաբար ուսումնասիրությունները և այդ ոլորտներում առկա խնդիրները մասնաճյուղին ուղղորդում են արձագանքել և մշտապես վերանայել իրականացվող կրթական ծրագրերի ցանկը: Դրա ապացույցն են 2019-2020 ուսումնական տարուց իրականացվող բակալավրական 3 նոր կրթական ծրագրերը («Հոգեբանություն», «Ռուսաց լեզու և գրականություն», «Դեկորատիվ կիրառական արվեստ»), ԿԳՄՄՆ լիցենզավորման գործակալության կողմից հեռակա ուսուցման «Դպրոցական մանկավարժություն և մեթոդիկա» մագիստրոսական կրթական ծրագրով կրթություն իրականացնելու թույլտվությունը: Սկսվել են նաև «Տնտեսական քաղաքականություն և իրավունք» մագիստրոսական և «Մեխատրոնիկա և ռոբոտոտեխնիկա» բակալավրական կրթական ծրագրերի ներդրման հայտերի պատրաստման գործընթացները:

Հաշվետու ուսումնական տարին մասնաճյուղի առկա ուսուցմամբ 12 մասնագիտությունների 13 կրթական ծրագրերով ընդունվել է 166 դիմորդ (նախորդ ուսումնական տարին 76-ի փոխարեն), այդ թվում՝ 35-ը անվճար, 131-ը վճարովի, իսկ հեռակա ուսուցմամբ 8 կրթական ծրագրերով՝ 52 դիմորդ (նախորդ ուսումնական տարին 40-ի փոխարեն): Մասնաճյուղի 336 դիմորդներից 326-ը (շուրջ 97%-ը) Տավուշի մարզի դպրոցների շրջանավարտներն են:

Մասնաճյուղն ընդունելության համակազմի պահպանման և ընդլայնման համար մշտապես կազմակերպում է փոխադարձ այցելություններ Տավուշի, Լոռու և Գեղարքունիքի մարզերի միջնակարգ և ավագ դպրոցներ, ավարտական դասարանների աշակերտների համար իրականացվում են դաս-քննարկումներ, «Բաց դռներ»-ի օրեր, բաց դասեր և օլիմպիադաներ: Համավարակի պայմաններում այս գործընթացն արդյունավետ իրականացվել է միայն 1-ին կիսամյակում (կատարվել են այցեր միայն Տավուշի մարզի 41 հանրակրթական դպրոցներ): Միջին մասնագիտական պետական ուսումնական հաստատությունների հետ մասնաճյուղի ակտիվ համագործակցության շրջանակներում բարձր առաջադիմությամբ քոլեջների 17 շրջանավարտ իրենց կրթությունը շարունակել են մասնաճյուղում՝ 7

մասնագիտությունների գծով: 2019-2020 ուսումնական տարում մասնաճյուղում բակալավրի կրթական ծրագրերով առկա և հեռակա ուսուցման համակարգերում ուսանել է 1307 ուսանող (նախորդ ուսումնական տարին՝ 1355): Նրանցից 1156-ը սովորել է վճարովի համակարգում, 118 ուսանող օգտվել է պետության կողմից ուսման վարձի լրիվ փոխհատուցման իրավունքից: 110 ուսանողների հատկացվել են պետական և ներ-բուհական կրթաթոշակներ, որոնցից 7-ին՝ անվանական: Ուսման վարձի մասնակի փոխհատուցում տրվել է մասնաճյուղի 250 ուսանողի, այդ թվում՝ 76-ը առկա ուսուցման համակարգում: Երկլեզու (հայերեն և անգլերեն) հավելվածով դիպլոմներ են հանձնվել մասնաճյուղի 348 շրջանավարտի, այդ թվում 166-ը՝ առկա ուսուցմամբ: Գերազանցության դիպլոմ է ստացել առկա ուսուցման 26 շրջանավարտ: Հաշվետու ուսումնական տարում 5 կրթական ծրագրերի ուսանողների համար մասնաճյուղում իրականացվել են մանկավարժի որակավորման լրացուցիչ դասընթացներ, որին մասնակցել են 1-ից 4-րդ կուրսերի 101 ուսանողներ, նրանցից 32-ը ստացել է մանկավարժի որակավորում:

Մասնաճյուղի շրջանավարտների ապագա գործունեությունը մշտապես գտնվում է մասնաճյուղի ուշադրության կենտրոնում: Ամեն տարի համալրվում և թարմացվում է շրջանավարտների, նրանց զբաղվածության և մասնագիտական գործունեության մասին տվյալների բազան: Արտաքին շահակիցների հետ համագործակցության շրջանակներում շրջանավարտներին տրամադրվել է տեղեկատվություն 62 թափուր հաստիքների մասին (43-ը՝ դպրոցների «Արմաթ» ինժեներական լաբորատորիաներում, 19-ը՝ տարբեր բանկային, պետական և հասարակական կազմակերպություններում):

Մասնաճյուղում բարձրորակ և խորը մասնագիտական ուսումնառությունն ապահովում է նրա բարձրակարգ գիտամանկավարժական կազմը: 2019-20 ուսումնական տարում մասնաճյուղում դասավանդել են հիմնական և համատեղությամբ աշխատող 117 դասախոս, այդ թվում՝ 10 պրոֆեսոր (8,6%), 43 դոցենտ (36,8%), որոնցից գիտական աստիճանով՝ 8 դոկտոր և 62 թեկնածու. գիտական աստիճան ունեցող դասախոսների հաշվեկշիռը 59,9% է: Մասնաճյուղի կիրառական արվեստի ֆակուլտետում դասավանդում են ՀՀ նկարիչների միության 7 և դիզայներների միության 1 անդամ: Մասնաճյուղի դասախոսների միջին տարիքը 48

է: Լրիվ հաստիքային համարժեքով ուսանող-դասախոս հարաբերությունը կազմել է 11,2: Մասնաճյուղի ղեկավարությունը մշտապես աջակցում ու խրախուսում է իր դասախոսների հետազոտական և մեթոդաբանական գործունեությունը: ԵՊՀ ԻՄ գիտական խորհրդում 2019թ. դեկտեմբերին հաստատվել է «ԵՊՀ Իջևանի մասնաճյուղի աշխատողներին աշխատանքի որոշ տեսակների կատարման համար վճարվող լրավճարների հաշվարկման և վճարման» կարգը, որով սահմանվել են աշխատողներին գիտահետազոտական, ուսումնամեթոդական, կազմակերպչական աշխատանքների որոշ տեսակների կատարման համար վճարվող հաշվարկման և վճարման կարգն ու պայմանները: Կարգում առանձնահատուկ կարևորվում և խրախուսվում են գիտական գործունեության արդյունքները: Կարգի համաձայն 2019թ. սեպտեմբերից մինչև 2020թ. սեպտեմբերն ընկած ժամանակահատվածում կատարված աշխատանքների համար աշխատակիցները կստանան շուրջ 500 հազար դրամ լրավճար: Մասնաճյուղի դասախոսական և ուսանողական կազմի գիտահետազոտական, գիտակրթական և գիտամեթոդական գործունեության զարգացմանը, տարբեր ոլորտներում հետազոտական ծրագրերի մշակմանը, կազմակերպմանն ու իրականացմանն աջակցելու համար մասնաճյուղում 2020թ. հուլիսից գործում է «Տավուշ» հետազոտական կենտրոնը: Կենտրոնում մշակվել է նրա բնականոն գործունեությունն ապահովող փաստաթղթերի փաթեթը: 2021 թվականից կենտրոնը կկազմակերպի գիտական դրամաշնորհների առաջին մրցույթը:

Շարունակվում են հետևողական աշխատանքները մասնաճյուղի գիտական հոդվածների «Ակունք» ժողովածուի գործունեությունը ԲՈԿ-ի նոր պահանջներին համապատասխանեցնելու համար, որովհետև ժողովածուի գոյությունը խթանում, նաև ֆինանսապես աջակցում է մասնաճյուղի դասախոսների գիտական գործունեությանը:

2019-2020 ուսումնական տարում մասնաճյուղն ունեցել է 1 ասպիրանտ և 3 հայցորդ, մասնաճյուղի 3 դասախոս ստացել է դոցենտի գիտական կոչում, 1-ը՝ պրոֆեսորի: Մասնաճյուղի հիմնական դասախոսական կազմի կողմից հրատարակվել է 34 գիտական հոդված, նրանք մասնակցել են հանրապետական 1 և 5 միջազգային 6 գիտաժողովի: Կիրառական արվեստի ֆակուլտետի դասախոսները մասնակցել են հանրապետական և միջազգային 23 ցուցահանդեսների:

2019-2020 ուսումնական տարում մասնաճյուղում շարունակվել է «Կրեդիտային համակարգով ԵՊՀ դասախոսական կազմի որակավորման բարձրացման կրթագիտական ծրագրի» 2016-2021թթ. շրջափուլի իրականացումը: Վերապատրաստումների արդյունավետ և նպատակային իրականացման, կրթական ծրագրերի և ուսումնական գործընթացների բարելավումանը աջակցելու համար մասնաճյուղում 2020թ. հունվարին ստեղծվել է Կրթական բարեփոխումների և դասախոսների վերապատրաստման բաժինը: Որակավորման բարձրացման ծրագրի մոդուլներով առկա և առցանց տարբերակներով իրականացվել է 6 դասընթաց: Առանձնահատուկ ուշադրություն է դարձվել ուսուցման նորարարական մեթոդների մատուցմանը: Համավարակի սկսվելուց անմիջապես հետո մասնաճյուղի կողմից իրակացվել են «ZOOM հարթակ», «Ինչպես օգտագործել Google forms ձևաչափի հնարավորություններն առցանց քննությունների համար» դասընթացները, պատրաստվել են համապատասխան մեթոդական ուղեցույցներ դասախոսների և ուսանողների համար, ինչպես նաև երկու տեսահոլովակ:

Մասնաճյուղի բոլոր ջանքերն ուղղված են ուսումնառությունից և մասնավորապես դասախոսների դասավանդման որակից և արդյունավետությունից, մանկավարժական և մասնագիտական կարողություններից ուսանողների բավարարվածության մակարդակի բարձրացմանը, ինչի վերաբերյալ ուսանողներն իրենց կարծիքներն արտահայտում են ԵՊՀ առցանց հարցման միջոցով: 2019-20 ուսումնական տարում 1-ին կիսամյակի միջին թվաքանակյան միավորը կազմել է 4.72, 2-րդ կիսամյակինը՝ 4.75 և այդ գնահատականները բարձր են նախորդ ուսումնական տարվա գնահատականներից:

Մասնաճյուղն առանձնահատուկ ուշադիր է ուսումնական գործընթացի անխափան և հարմարավետ կազմակերպման նկատմամբ: Հաշվետու ուսումնական տարում վերանորոգվել են լսարանները, լաբորատորիաները և արվեստանոցները, նրանց համար ձեռք է բերվել անհրաժեշտ գույք, տեղադրվել են տեսահսկման սարքեր, ներդրվել է անվտանգության ժամանակակից համակարգ: Մասնաճյուղում գործում է 178 համակարգչով ներքին ցանց, մասնաճյուղն ունի համակարգչային 4 սրահ, տեսասարքերով համալրված 4 լսարան, համակարգչային տեխնիկայով համալրված 6 լսարաններ, 6 արվեստանոցներ: Հաշվետու ուսումնական տարվա 2-րդ

կիսամյակում ստեղծված համավարակային պայմաններում մասնաճյուղն արագ անցել է առցանց ուսուցման կազմակերպմանը հստակ դասացուցակով, այդ նպատակով Zoom հարթակում ստեղծվել է 55 հաշիվ: Հաշվետու ուսումնական տարին բարելավվել են 112 համակարգիչների պարամետրերը, ինչի համար ձեռք են բերվել 886 հազար դրամի սարքավորումներ, արագացել է ինտերնետ կապը:

Մասնաճյուղը վարում է կայուն ֆինանսական և ռեսուրսախնայողության քաղաքականություն, աշխատավարձերը վճարվում են առանց ուշացումների, 2-րդ կիսամյակի առցանց ուսումնառությունն իր հերթին ապահովել է որոշակի խնայողություն: Ֆինանսների հոսքեր ապահովվել են նաև 2019 թվականին ներդրված ավանդների գծով՝ այն ավելացնելով 270 մլն դրամով:

Սոցիալական աջակցության ծրագրերի շրջանակներում մասնաճյուղը 2020թ. մարտին «Նաիրի ինշուրանս» ապահովագրական ընկերության հետ կնքել է պայմանագիր, որի համաձայն առաջին անգամ մասնաճյուղի 151 հիմնական աշխատակից մինչև տարեվերջ կունենան առողջության ապահովագրություն: 2019-2020 ուսումնական տարում տարբեր նպատակներով մասնաճյուղի արհիվորային ֆինանսական միջոցներից աջակցություն է ստացել 24 աշխատակից: Համավարակով պայմանավորված հաշվետու ուսումնական տարին Մայր բուհի սոցիալական աջակցության ծրագրերի շրջանակներում մասնաճյուղի աշխատակիցները չեն օգտվել ԵՊՀ հանգստյան և մարզաառողջարանային բազաներից:

Մասնաճյուղի ռազմավարական կարևոր խնդիրներից է ուսանողների արդյունավետ և նպատակային պրակտիկաների իրականացումը, որոնց ծրագրերը պարբերաբար վերանայվում են: Համավարակի պայմաններում 2019-2020 ուսումնական տարվա 2-րդ կիսամյակի պրակտիկաների մի մասն իրականացվել է առցանց եղանակով՝ առաջ բերելով ևս մեկ անգամ ծրագրերը վերանայելու անհրաժեշտություն: Մասնաճյուղը տարբեր կազմակերպությունների և ձեռնարկությունների հետ ունեցել է ուսումնական, արտադրական և մանկավարժական պրակտիկաների իրականացման 34 պայմանագիր: Այդ պրակտիկաների արդյունավետ իրականացման համար մասնաճյուղը հատկացրել է շուրջ 668 հազար դրամի ֆինանսական ռեսուրսներ:

ԵՊՀ Իջևանի մասնաճյուղում գործընթացների և տարբեր իրադարձությունների, ուսանողական կյանքի վերաբերյալ տեղեկատվության հասանելիությանն աջակցում են անվճար ինտերնետ կայք, մասնաճյուղի պաշտոնական և էլեկտրոնային գրադարանի կայքէջերը, Facebook սոցիալական ցանցում գործող մասնաճյուղի, նրա ստորաբաժանումների և ուսանողական կառույցների էջերը: 2020թ. հունիսի դրությամբ մասնաճյուղի պաշտոնական կայքն ունի 256 էջ, որից 4-ը ներդրվել է հաշվետու ուսումնական տարում: 2019-2020 ուսումնական տարում տեղադրվել են 35 հոդված ու տեսանյութ, 73 հայտարարություն, 128 նորություն, լուսաբանվել են 2 իրադարձություն և 3 գիտական կոնֆերանս ու նստաշրջան: Կայքը պարբերաբար վերակառուցվում է:

Մասնաճյուղի էլեկտրոնային գրադարանի կայքն իր այցելուներին տրամադրում է առավել քան 1000 էլեկտրոնային գիրք: Գրադարանը համագործակցում է ԵՊՀ գիտական գրադարանի հետ, հաշվետու ուսումնական տարին այն համալրվել է շուրջ 300 միավոր գրականությամբ, այդ թվում կատարվել են որոշ քանակությամբ նվիրատվություններ: Նոր գրականության ձեռք բերման համար գրադարանում ներդրված է պահանջագրերի ինստիտուտը: Գիտական և մշակութային գրականության և ընթերցանության կենտրոն լինելուց բացի այն հանդիպումների, ազատ քննարկումների, գրքերի շնորհանդեսների, ցուցադրությունների և մշակութային նախաձեռնությունների կենտրոն է: Գրադարանի վարիչը պարբերաբար մասնակցում է Հայաստանյան նորարար գրադարանների աշխատաժողովներին:

Մասնաճյուղի գործունեության, Տավուշի մարզի սոցիալ-մշակութային և ուսումնագիտական կյանքում նրա ունեցած դերի և պահանջվածության վերաբերյալ հասարակության կարծիքի ուսումնասիրման համար մասնագիտական կրթության որակի ապահովման բաժինը իր ֆեյսբուքյան էջի միջոցով 2019 թվականի սեպտեմբեր-դեկտեմբեր ամիսներին իրականացրել է հարցում: Հարցմանը մասնակցած Տավուշի և այլ մարզերի 32 համայնքների թվով 183 բնակիչների 91%-ը ԵՊՀ ԻՄ-ի դերը գնահատել է գերազանց և լավ՝ միջին գնահատականը կազմել է 4.5:

Մասնաճյուղը կրթության, գիտության, մշակույթի, պատմական և ազգագրական գործունեության, երիտասարդական քաղաքականության մի շարք

ուղղություններում հետևողական ընդլայնում է իր համագործակցությունների շրջանակը: 2019-2020 ուսումնական տարին համատեղ կրթական և գիտահետազոտական ծրագրեր, միջոցառումներ և դասընթացներ իրականացնելու համար կնքվել են համագործակցության 8 պայմանագրեր և հուշագրեր: Այդ թվում մասնաճյուղն ակտիվ համագործակցում է «Շիրակի Մ.Նալբանդյանի անվան պետական համալսարան» հիմնադրամի և ՌԴ Գժելի պետական համալսարանի հետ: Հաշվետու ուսումնական տարին, համավարակի հետևանքով ուսանողների փոխանակության ծրագրի շրջանակներում չի կայացել մասնաճյուղի ուսանողների ամենամյա այցը Ֆրանսիայի Վալանս քաղաքի Մաեստրիխտ համալսարան, իսկ «Ֆրանս-հայկական ասոցիացիայի» ներկայացուցիչների այցը մասնաճյուղ տեղի ունեցավ և կրթաթոշակներ հանձնվեցին նախապես ընտրված ուսանողներին:

2020թ. փետրվարին ԱՄՆ դեսպանատան հետ համագործակցության շրջանակներում պայմանագիր է կնքվել «Փրոջեքթ հարմոնի» կազմակերպության հայաստանյան մասնաճյուղի հետ, որի շնորհիվ մասնաճյուղում ստեղծվել է «Ամերիկյան գրադարան և դասընթացի կենտրոն», որտեղ հաշվետու ուսումնական տարում կազմակերպվել են անգլերեն լեզվի և այլ դասընթացներ ուսանողների, դասախոսների և մարզի աշակերտների ու երիտասարդների համար:

Մասնաճյուղի արտաքին կապերի բաժնի նախաձեռնությամբ 2019-20 ուսումնական տարում իրականացվել են մի շարք համագործակցային ծրագրեր, որոնց նպատակն է եղել ուսանողներին ներգրավել մարզի հիմնախնդիրների, ուսանողների կարիքների, սոցիալական և տնտեսական խնդիրների ուսումնասիրմանը, վերհանմանը և հնարավորության դեպքում դրանց լուծմանը: Հաշվետու ուսումնական տարում համագործակցող կազմակերպությունների, հիմնադրամների, ընկերությունների հետ համատեղ ուսանողների համար կազմակերպվել են շուրջ երկու տասնյակ առկա և առցանց դասընթացներ և քննարկումներ, այցելություններ և այլն: Տավուշի թեմի առաջնորդարանի աջակցությամբ 100 հազար դրամի չափով փոխհատուցվել է մասնաճյուղի 25 ուսանողների ուսման վարձերը: Կազմակերպվել է հանդիպում մասնաճյուղի հաջողակ շրջանավարտների հետ: «Քարտեզագրություն և կադաստրային գործ» կրթական ծրագրի 4-րդ կուրսի ուսանողները Իջևանի քաղաքապետարանում

մասնակցել են «Իջևան համայնքի մունիցիպալ կառավարման տեղեկատվական համակարգը ԱՏՀ հիմքով» ծրագրին և այլն:

Հաշվետու ժամանակահատվածում ՀՕՖ-ի Մաթևոսյան կրթավճար ծրագրի շրջանակներում մասնաճյուղի 7 ուսանողների տրամադրվել է ուսման վճարի ամբողջական փոխհատուցում, Հինդլյան կրթավճար ծրագրով՝ 14 ուսանողների ամբողջական և մասնակի փոխհատուցում: Մասնաճյուղը ներառված է նաև «Անուշ Մաթևոսյան կրթավճար» ծրագրում:

Մասնաճյուղի ուսումնագիտական և մարզամշակութային առօրյան ձևավորում են ուսանողական կառույցները: 2019-2020 ուսումնական տարում ուսանողական գիտական ընկերության նախաձեռնությամբ կազմակերպվել է մասնաճյուղի 25-ամյակին նվիրված «Անկախության առաջնեկը» հանրապետական գիտաժողովը (մասնակցել են ՀՀ 25 բուհերի 38 ուսանողներ և նրանց զեկուցումները տպագրվել են «Ակունք» գիտական հոդվածների ժողովածուում), «ՀՀ նախագահությունը ԵԱՏՄ-ում 2019 թվականին. ձեռքբերումներն ու առկա խնդիրները» թեմայով սեմինար-քննարկումը, որի ժամանակ ուսանողներին հետաքրքրող հարցերին հանգամանակից պատասխանել է ՀՀ ԱԺ փորձագետ, պ.գ.թ., դոցենտ Գրիգոր Բալասանյանը, «Աշխարհը՝ COVID 19-ից առաջ և հետո» առցանց սեմինար-քննարկումը, որը վարել է ՀՀ Կենտրոնական բանկի Հատուկ հետազոտությունների բաժնի ղեկավար, տ.գ.թ., ասիստենտ Գևորգ Մինասյանը: Մասնաճյուղի ուսանողների հավաքականը մասնակցել և հաղթել է ՀՊՄՀ-ի ՈՒԽ-ի հիմնադրման 25-ամյակին նվիրված «12-ամյա կրթական համակարգն ապահովում է բարձրորակ կրթություն ՀՀ-ում» թեմայով բանավեճում և ինտելեկտուալ խաղում: Ամբողջ ուսումնական տարվա ընթացքում պարբերաբար կազմակերպվել են «Ամենախելացին» ինտելեկտուալ խաղը՝ նաև առցանց տարբերակով, կանանց և տղամարդկանց շախմատի մասնաճյուղային առաջնություններ, կինոդիտումներ, մրցույթներ, խաղարկություններ և այլն:

Մասնաճյուղի ուսանողական խորհուրդը պաշտպանում, հետևողականորեն բարձրաձայնում և լուծում է ուսանողների ուսումնական և մշակութային կարիքները: Նա իր ներկայացուցիչներն ունի մասնաճյուղի կառավարման բոլոր օղակներում, որոնք ակտիվ մասնակցում են մասնաճյուղի ռազմավարական գործունեության

իրականացման ծրագրերին և միջոցառումներին, իսկ իրենց ձեռք բերած կառավարման հմտությունները նրանք դրսևորել են ուսանողական ռեկտորատում: 2019-2020 ուսումնական տարում մասնաճյուղի ուսանողական խորհուրդը կազմակերպել է հանրապետական և միջազգային տարբեր տոներին, մասնավորապես մասնաճյուղի 25-ամյակին նվիրված միջոցառումներ՝ ֆոտոմրցույթ, գեղանկարների, գրաֆիկական և ազատ ոճային նկարների մրցույթ, ցուցահանդես, խնայողությունների խաղ, «Ուսանողների կրեատիվ մտքի ձևավորումը շուկայում» մոդուլ խաղ, կինոմանների մրցույթ և կինոդիտումներ, իրականացրել է մասնագիտական թեմատիկ քննարկումներ: Ֆակուլտետներում գործել են մասնագիտական ակումբներ և այլն:

2019-2020 ուսումնական տարում ևս մասնաճյուղի «Անգլերեն լեզու և գրականություն» մասնագիտության ուսանողները մասնակցելով ԱՄՆ խաղաղության կորպուսի կողմից կազմակերպվող “Write On! Competition 2020” էսսեների միջազգային մրցույթին զբաղեցրել են առաջին տեղեր: Մասնաճյուղի «Ինֆորմատիկա և կիրառական մաթեմատիկա» կրթական ծրագրի ուսանողը ՀՀ պետական բուհերի 14 ուսանողների հետ ճանաչվել է ՀՀ լավագույն ուսանող և այցելել Արաբական Միացյալ Էմիրությունների մայրաքաղաք Աբու Դաբիի Գիտության և տեխնոլոգիայի Խալիֆա համալսարան:

Որակի ներքին ապահովման գործընթացները ներառում են մասնաճյուղի գործունեության բոլոր ոլորտները: Մասնաճյուղի մասնագիտական կրթության որակի ապահովման (ՄԿՈԱ) բաժինը 2019-2020 ուսումնական տարում արդյունավետ աշխատել է կրթական ծրագրերի ղեկավարների հետ, աջակցել է նոր կրթական ծրագրերի հաստատման գործընթացին, խորհրդատվություններով աջակցել է ամբիոններին՝ դասընթացների փաթեթների կազմման գործում, կատարել է արտաքին և ներքին շահակիցների կրթական կարիքների ուսումնասիրություն, վեր է հանել խնդիրները, հավաքագրել նրանց առաջարկները և կատարել դրանց վերլուծություն: Այս գործընթացներում ակտիվ մասնակցել է նաև որակի ներքին գործընթացներին աջակցող ուսանողական աշխատանքային խումբը:

Հաշվետու ուսումնական տարում ՄԿՈԱ բաժինը ներքին և արտաքին շահակիցների քննությանն է ներկայացրել մասնաճյուղի 2014-2019թթ.

գործունեության գնահատման առանցքային ցուցանիշների (ԳԱՑ) լրամշակված համակագմբ: 2019թ. դեկտեմբերին կազմակերպել է ԵՊՀ Իջևանի մասնաճյուղի 25-ամյակին նվիրված «Ես վստահում եմ իմ բուհին» խորագրով աշխատաժողով, որում ներկայացվել և քննարկվել են ուսանողների և դասախոսների մոտիվացիային խանգարող օբյեկտիվ և սուբյեկտիվ գործոնները, վեր հանվել դրանց հաղթահարման ճանապարհները: 2020թ. հունվար-մարտ ամիսներին համակարգել է մասնաճյուղի ինստիտուցիոնալ ինքնագնահատման գործընթացը, որի արդյունքում կազմվել է ինքնավերլուծության զեկույցը:

2020թ. մայիս-հունիս ամիսներին բաժինն առաջին անգամ ուսանողների և դասախոսների շրջանում իրականացրել է ուսումնասիրություն առցանց կրթության տված հնարավորությունների և խնդիրների վերաբերյալ: Հարցմանը մասնակցել է մասնաճյուղի առկա ուսուցման 1-ից 3-րդ կուրսերի 289-ը (80%) և 10 ամբիոնների 93 դասախոս (63%-ը): Հարցման արդյունքները վկայել են, որ մասնաճյուղում հաջողվել է արդյունավետ իրականցնել առցանց ուսուցում, ապահովել գիտելիքի և մասնագիտական կարողությունների փոխանցում, ուսանողի ձեռքբերումների գնահատում և այլն: Հարցմանը մասնակցած բոլոր դասախոսները և ուսանողների գերակշիռ մասը՝ 84,4%-ը փաստել են, որ բավարարված են մասնաճյուղում առցանց ուսուցման կազմակերպումից:

Մասնաճյուղի աշխատակազմը գիտակցում է, որ Մայր բուհի միակ մասնաճյուղը լինելը մեծ պատասխանատվություն է և պատիվ, ուստի կշարունակի ամեն ինչ անել այդ բարձր անունը պատվով կրելու համար: »:

Արտահայտվեց ԵՊՀ Բնական և ճշգրիտ մասնագիտությունների գծով պրոռեկտոր Ռ. Բարխուդարյանը, պրոֆեսոր Մ. Միքայելյանը, ԵՊՀ ԻՄ-ի ՈւՆ նախագահ Լուիզա Մադաթյանը:

Մասնավորապես Ռ. Բարխուդարյանը կարևորեց ուսանողական հարցումների մեջ հեռակա և առակա ուսուցման համակարգերի համաեմատական վերլուծությունը իսկ Լուիզա Մադաթյանին հետաքրքրում էր այն հարցը թե որքանով է համապատասխանում տարածաշրջանի խնդիրներին Տնտեսական քաղաքականություն և իրավունք մասնագիտությամբ նախատեսվող մագիստրոսական կրթական ծրագիրը, որնի ի պատասխան Մ. Միքայելյանը նշեց,

որ կատարվել են հարցումներ շրջանավարտների շրջանում, քննարկվել են համապատասխան մասնագիտական ամբիոններում և ֆակուլտետի գիտական խորհրդում:

Առցանց քվեարկությամբ՝ 29 կողմ, 0 դեմ, 0 ձեռնպահ, **որոշվել է.**

Որոշում 48/3

Ընդունել ի գիտություն:

Օրակարգի երրորդ՝ «ԵՊՀ ԻՄ-ի 2021թ. եկամուտների և ծախսերի նախահաշվի (բյուջե) մասին » հարցի հետ կապված լսեցին ԵՊՀ ԻՄ գլխավոր հաշվապահ Մ. Մխիթարյանի հաղորդումը:

ԵՊՀ ԻՄ գլխավոր հաշվապահ Մ. Մխիթարյանը մանրամասն ներկայացրեց ԵՊՀ ԻՄ-ի 2021թ. եկամուտների և ծախսերի նախահաշվը՝ տես հավելված 1: Մասնավորապես կատարվեց համեմատություն նախորդ բյուջեի հետ և նշվեց, որ այս տարի նախահաշվում ունենք 10 միլիոն դրամ պակաս քան նախորդ տարի էր նախատեսված:

Արտահայտվեցին՝ Ռ. Բարխուդարյանը, Ա. Մակարյանը, Գ. Սիմոնյանը, Լ. Հարությունյանը, Ա. Մարգարյանը, Մ. Միքայելյանը, Մ. Զուրաբյանը:

Առցանց քվեարկությամբ՝ 30 կողմ, 0 դեմ, 0 ձեռնպահ, **որոշվել է.**

Որոշում 48/4

Ղեկավարվելով Երևանի պետական համալսարանի Իջևանի մասնաճյուղի կանոնադրության 21-րդ կետի 11-րդ ենթակետով և Երևանի պետական համալսարանի Իջևանի մասնաճյուղի գիտական խորհրդի կանոնակարգի 4-րդ կետի 11-րդ ենթակետով՝ Երևանի պետական համալսարանի Իջևանի մասնաճյուղի գիտական խորհուրդը որոշում է.

- 1 Հավանություն տալ Երևանի պետական համալսարանի Իջևանի մասնաճյուղի 2021 թվականի եկամուտների և ծախսերի տարեկան նախահաշվի նախագծին համաձայն հավելված 1-ի:
- 2 Երևանի պետական համալսարանի Իջևանի մասնաճյուղի 2021 թվականի եկամուտների և ծախսերի տարեկան նախահաշվը ներկայացնել ԵՊՀ հաստատման:

Ընթացիկ հարցեր:

Լսեցին՝ 4.1 «Երևանի պետական համալսարան» հիմնադրամի Իջևանի մասնաճյուղում գիտական դրամաշնորհների տրամադրման կարգը հաստատելու մասին լսեցին ԵՊՀ ԻՄ-ի տնօրենի պաշտոնակատար Ա. Մակարյանի հաղորդումը: Նա նշեց, որ ներկայացվող կարգը (տես հավելված 2) նախօրոք ուղարկվել է գիտխորհրդի անդամներին, որոնք հնարավորություն են ունեցել մանրամասն ծանոթանալու և գրավոր առաջարկություններ ուղարկելու:

Արտահայտվեցին՝ Ռ. Բարխուդարյանը, Ա. Մակարյանը, Գ. Սիմոնյանը, Մ. Միքայելյանը, Վ. Ավագյանը, Գ. Հովհաննիսյան, Մ. Ճաղարյանը:

Մասնավորապես եղան առաջարկներ փորձագետների քանակի և վարձատրության վերաբերյալ, հայտի գնահատման միավորների վերաբաշխման հետ կապված և այլն: Ա. Մակարյանը նշեց, որ օգտվելու ենք ԳՊԿ-ի փորձագետների բազայից, որոնք վարձատրվելու են:

Արտահայտվողները առաջարկեցին հաստատել կարգը առաջարկվող (առաջարկները մանրամասն հստակեցված կուղարկվեն գիտքարտուղարին գրավոր) փոփոխություններով հանդերձ:

Առցանց քվեարկությամբ՝ 27 կողմ, 0 դեմ, 0 ձեռնպահ ***որոշեցին***.

Որոշում 48/5

Ղեկավարվելով Երևանի պետական համալսարանի Իջևանի մասնաճյուղի կանոնադրության 21-րդ կետի 5-րդ ենթակետով և Երևանի պետական համալսարանի Իջևանի մասնաճյուղի գիտական խորհրդի կանոնակարգի 4-րդ կետի 5-րդ ենթակետով՝ Երևանի պետական համալսարանի Իջևանի մասնաճյուղի գիտական խորհուրդը որոշում է.

1. Հաստատել «Երևանի պետական համալսարան» հիմնադրամի Իջևանի մասնաճյուղում գիտական դրամաշնորհների տրամադրման կարգը համաձայն հավելված 2-ի:
2. Որոշումն ուժի մեջ է մտնում հրապարակման պահից:

Լսեցին՝ 4.2 «Երևանի պետական համալսարանի Իջևանի մասնաճյուղում բակալավրի ավարտական աշխատանքի պատրաստման և գնահատման կարգը»

հաստատելու մասին լսեցին ԵՊՀ ԻՄ-ի տնօրենի պաշտոնակատար Ա. Մակարյանի հաղորդումը: Նա նշեց, որ անցած տարվա ավարտական աշխատանքների պաշտպանությունը մեզ հնարավորություն ընձեռեց նկատել մի շարք բացթողումներ, որոնք անհրաժեշտ էր ուղղել, ընդ որում առաջացած խնդիրները ուղղորդեցին մեզ անել որոշակի փոփոխություններ գործող կարգում: Ա. Մակարյանը մանրամասն ներկայացրեց կատարված փոփոխությունները: Նոր կարգը կարող էք տեսնել հավելված 3-ում:

Արտահայտվեցին՝ Ռ. Բարխուդարյանը, Ա. Մակարյանը, Գ. Սիմոնյանը, Մ. Միքայելյանը, Վ. Ավագյանը, Գ. Հովհաննիսյան, Մ. Ճաղարյանը:

Մասնավորապես առաջարկվեց 4.9. կետը՝ «Գրախոսների կազմը հաստատվում է ամբիոնի վարիչի կողմից» ձևակերպել հետևյալ կերպ՝ «Գրախոսների կազմը որոշվում է նախապաշտպանությունից հետո և հաստատվում է ամբիոնի վարիչի կողմից», եղան առաջարկներ նաև 1.6, 4.7, 6.3 և այլ կետերի վերաբերյալ:

Առցանց քվեարկությամբ՝ 26 կողմ, 0 դեմ, 0 ձեռնպահ **որոշեցին**

Որոշում 48/6

Ղեկավարվելով Երևանի պետական համալսարանի Իջևանի մասնաճյուղի կանոնադրության 21-րդ կետի 5-րդ ենթակետով և Երևանի պետական համալսարանի Իջևանի մասնաճյուղի գիտական խորհրդի կանոնակարգի 4-րդ կետի 5-րդ ենթակետով՝ Երևանի պետական համալսարանի Իջևանի մասնաճյուղի գիտական խորհուրդը որոշում է.

1. Հաստատել «Երևանի պետական համալսարանի Իջևանի մասնաճյուղում բակալավրի ավարտական աշխատանքի պատրաստման և գնահատման կարգը» համաձայն հավելված 3-ի:
2. Ուժը կորցրած ճանաչել 28.02.2018թ. -ին կայացած ԵՊՀ ԻՄ գիտական խորհրդի թիվ 29/6 որոշումը:
3. Որոշումն ուժի մեջ է մտնում հրապարակման պահից:

ԳԻՏԱԿԱՆ ԽՈՐՀՐԴԻ ՆԱԽԱԳԱՀ _____ Ա. Հ. ՄԱԿԱՐՅԱՆ

ԳԻՏԱԿԱՆ ԽՈՐՀՐԴԻ ՔԱՐՏՈՒՂԱՐ _____ Մ. Ս. ԱԹՈՅԱՆ